

I pìcoi ciantarins se à fat onor

N grop de scoles de la scola de musega "Il Pentagramma" à tout pèrt al concors de letura musicala de Perugia



I arlieves de la scola de musega "Il Pentagramma" che à tout pèrt al concors ensema al maester Ilario Defrancesco.

Musega - "Ciante la notes" l'à inom l concors de letura musicala che à vedù protagonisc enstadì ence i scoles de la scola de musega "Il Pentagramma", stat a Ponte Felcino vejìn a Perugia.

A chest concors, che é rresservà a la scoles che ge va dò a l'ensegnament didatich di Minipolifonics de Nicola Conci, stat diretor de Le Voci Bianche de la Scala de Milan e de Eleonora Dalbosco, à tout pèrt 7 joegn ciantarins, sot la vida del maester Ilario Defrancesco. E chisc joegn artisè se à dassen fat onor dalajà che i se à portà a cèsa adertura trei pesé.

Al concors à tout pèrt na trentina de concorenca da 3 scoles de la Tèlia: chela de Fascia, una de la Val de Non e una de Padova. I partezipanc é stac spartii te trei categorìes: Primi Passi, Allievi e Esperti. Tedant a la giuria i cognea saer portèr dant 6 o 7 proes: la esecuzions de melodies e de cianties a una o a più oujes che i se aea emparà dantfora, ma ence na proa che la comiscion ge à dat sù la sera inant del concors.

E enceben che la proes sie states

belebon senestres nesc arlieves à sapù les portèr dant a na vida dassen ezelenta. Te la categoria Allievi Sebastiano Dorich e Chiara Rasom se à vadagnà n bel secont pest e l grop con Luisa Del Frè, Aurora Ruzzu e Isaia Defrancesco à ciapà l terz premie, enveze Martina Iori e Sebastiano Goss se à classificà prumes de la categoria Esperti.

L'é stat segur na bela scomenzadiva che à arvejinà duc chisc ciantarins e che à servì ence desche moment de baratò e de crescimonìa. "Son content che i bec aesse fat chesta esperienza – à dit l maester Ilario Defrancesco – percheche i se à metù a la proa con de etres bec che spartesc con ic la medema pascion de la musega e del ciantèr."

Per veder e cognoscer miec l lurier de la scola de musega "Il Pentagramma" se pel veder amò anché te Museo Ladin, da les 3 a les 7 e da les 20.30 a les 22.00 la bela mostra endrezèda per festejèr i 25 egn de atività. Chesta sera da les 20.30 se pel ence scutèr l pìcol concert de la clas de piano, tastiera, clarinet e sax che serarà sù l moment de festa. (mci)